



Sumáriu Kazu

Marsu 2013

Sumáriu julgamentu kazu iha Tribunál Distritál Baucau ba Periódu Marsu 2013

Iha Marsu 2013, JSMP kontinua hala'o nia servisu monitorizasaun iha Tribunál Distritál Baucau hanesan normal.

Iha atividade monitorizasaun ne'e, JSMP konsege rejista kazu krime hamutuk 15. Kazu hirak ne'e, kompostu husi krime furtu simples 1, abuzu seksuál 2, violénsia doméstika 6, ofensa ba integridade fízika simples 1, ofensa ba integridade fízika grave 1, omisídiu negligente 1, omisídiu agravadu 1, danu agravadu 1 no krime ameasa 1.

Husi total kazu ne'e maioria hetan ona konkluziun finál liu husi pena suspensaun inklui ba kazu violénsia doméstika, maibé ba kazu abuzu seksuál ba menór hetan kondensaun ho pena prizaun. Mesmu nune'e, iha kazu krime violénsia doméstika 1, krime danu agravadu 1 mak kontinua adia tanba parte sira la kumpre notifikasaun.

Entre kazu sira ne'ebé tribunál termina ona nia prosesu, iha kazu ida ne'ebé julga ho Nú. Prosesu 97/Crm.S/2012/TDB kona-ba krime omisídiu negligente mak interesante atu observa klean nia prosesu. JSMP nota katak prosesu produsaun prova ba kazu ne'e la klean. Iha faktu balun ne'ebé kontrariu ba malu entre arguidu ho testamuña sira. Pur-zemplu arguidu deklarata katak bainhira nia apita dala 3, vítima la rona no vítima kontinua la'o ba kareta kotuk no lori nia ulun ba baku ba kareta. Iha fatin seluk, testamuña na'in 2 ne'ebé tur hamutuk ho arguidu iha kareta oin deklarata katak arguidu halai ses kareta seluk no kareta kidun mak baku vítima nia ulun no kauza vítima mate.

Ba JSMP krime negligensia ne'ebé kauza ema seluk lakon nia vida nu'udar krime ne'ebe seriu no la iha fatin atu hetan absovisaun, satan ho faktu ne'ebé kontrariu ba malu. Tuir lolos tribunal tenke kondena arguidu ho pena prizaun ka pena aplikavel sira seluk tanba ho arguidu nia negligensia prejudika ema seluk lakon nia vida. Krime negligensia mós la'os konsidera hanesan kauza ne'ebé esklui ilisitude tuir artigu 43 Kódigu Penál.

Tuir mai deskripsaun sumáriu julgamentu kompletu:

1. Kazu krime furtu simples - Nú. 136/Crm.S/2012/TDB

Tribunál Distritál Baucau
Kompozisaun Tribunál : Singulár
Juis : Dr. José Gonalves
Ministériu Públiku : Dr. Baltazar Ramós
Defeza : Dr. Rui M. Guterres

Konkluzau : Kondena ho pena multa

Iha 04 no 18 Marsu 2013, Tribunál Distritál Baucau hala'o prosesu julgamentu no kontinua ho leitura sentensa ba kazu furtu simples ne'ebé komete husi arguidu Paul Pinto no Felis do Carmo Lemós hasoru Estadu (PLN Distritu Manatuto) iha 2009 nia laran.

Julgamentu ne'e hala'o iha Distritu Manatuto liu husi programa julgamentu movél. Ministériu Públiku akuza katak kazu ne'e akontese dala rua, prímeiru akontese iha 2009 (arguidu sira haluha loron akontesímentu) no sigundu akontese iha 07 Novembru 2009.

Iha akuzasaun Ministériu Públiku nia haktuir katak arguidu sira foti mina gazoel nian husi *Perusahaan Listrik Negara (PLN)* Manatuto nian hamutuk litru 30 no fa'an ba komunidadade Manatutu. Tuir mai arguidu Paul Pinto foti tan litru 20 maibé momentu ne'ebá kedas polisia sira hetan no halo kapturasau ba arguidu ne'e. Ministériu Públiku akuza sira kontra artigu 251 Kódigu Penál.

Iha tribunál, arguidu sira rekoñese faktu sira ne'ebé Ministériu Públiku akuza hasoru sira. Nune'e Ministériu Públiku rekere ba tribunál atu la rona tan testemuña sira tanba provas suficiente ona. Tribunál simu rekerimentu ne'e, no kontinua kontinua ba alegasaun finál.

Iha alegasaun ne'e, Ministériu Públiku husu ba tribunál atu kondena arguidu sira ho pena tinan 3 prizaun maibé suspende nia ezekusaun. Parte defeza husu kastigu ne'ebé kmaan ba arguidu sira tanba arguidu sira konfesa, arepende ba sira nia hahalok no responsabiliza ba sira nia familia

Julgamentu ne'e konklui iha 18 Marsu 2013, liu husi julgamentu movél iha Distritu Manatuto ho rezultadu kondena arguidu sira ho pena prizaun fulan 6 maibé suspende ba tinan 1, selu indeminizasaun sivil ba estadu hamutuk \$ 30.00 no kondena mós sira selu kustas judisial kada ema ida US\$. 10.00

2. Kazu krime abuzu seksuál ba menór - Nú. 113/Crm.C/2012/TDB

Tribunál Distritál Baucau

Kompozisaun tribunál : Koletivu

Juis : Dr. Jose Gonçalves (representante juis koletivu)

Minsitériu Públiku : Dr. Baltazar Ramós

Defeza : Dr. Paulino da Costa Alves

Konkluzau : Kondena pena prizaun

Iha 05 Marsu 2013, Tribunál Distritál Baucau lee akordaun ba kazu krime abuzu seksuál ba menór ne'ebé involve arguidu Rui da Silva hasoru vítima ho inisiál FMR. Kazu ne'e akontese iha 07 Agostu 2010, iha Distritu Lautem.

Ministériu Públiku akuza arguidu kontra artigu 177 Kódigu Penál ho nia agravasaun iha artigu 182 alinea 1.a. Kódigu Penál.

Tribunál prova katak iha faktu ne'ebé hatudu arguidu taka vítima niaibun no komete abuzu seksuál hasoru vítima ne'ebé sei idade menóridade.

Bazeia ba faktu provadu sira ne'e no avalia mós sirkunstánsia no kodisaun hotu-hotu ne'ebé haleu krime ne'e, tribunál konklui hodi kondena arguidu ho pena tinan 7 fulan 6 prizaun.

3. Kazu krime ofensa ba integridade física simples - Nú. 116/Crm.S/2012/TDB

Tribunál Distritál Baucau

Kompozisaun tribunál : Singulár

Juis : Dr. Afonso Carmona

Ministériu Públiku : Dr. Aderito Tilman

Defeza : Dr. Rui M. Guterres

Konkluzau : Kondena pena suspensaun

Iha 06 no 19 Marsu 2013, Tribunál Distritál Baucau hala'o julgamentu no hamonu sentensa ba kazu krime violénsia doméstika ne'ebé involve arguidu Manuel Soares hasoru vítima Maria Joana hanesan arguidu nia kaben. Kazu ida ne'e akontese iha 22 Feveireiru 2012 iha Aldeia Aitehe, Suku Aiteas, Sub-Distritu Manatutu, Distritu Manatutu.

Iha akuzasaun haktuir katak iha lora akontesimentu, arguidu tolok no tuku iha vítima nia matan, tuku iha ibun no tuku iha vítima nia kotuk. Aktu ne'e kauza vítima sofre kanek iha ibun no bubu iha matan fukun.

Ministériu Públiku akuza arguidu kontra artigu 145 Kódigu Penal konjuga ho artigu 35 Lei Kontra Violénsia Doméstika.

Iha audiénsia laran, arguidu konfesa katak faktus ne'ebé Ministériu Públiku alega ba nia ne'e loos hotu maibé arguidu deklarara katak nia arepende ninia hahalok ne'e.

Iha alegasaun Ministériu Públiku husu ba tribunál atu kondena arguidu ho pena fulan 6 prizaun maibé suspende ba tinan 1. Parte seluk, defeza husu ba tribunál atu fo kastigu ne'ebé kmaan ba arguidu tanba arguidu konfesa no arepende nia hahalok, laiha antesidente kriminais no responsabiliza ba familia.

Prosesu ne'e konklui iha 19 Marsu 2013 ho rezultadu tribunál kondena arguidu ho pena fulan 3 prizaun maibé suspende ba fulan 6, selu kustus judisial hamutuk \$ 20.00.

4. Kazu krime omisídiu negligente - Nú. 97/Crm.S/2012/TDB

Tribunál Distritál Baucau

Kompozisaun Tribunál : Singulár

Juis : Dr. Antonio Fonseca Monteiro

Minsitériu Públiku : Dr. Aderito Tilman

Defeza : Dr. Rui M. Guterres

Konkluzau : Absolve

Iha 06 no 20 Marsu 2013, Tribunál Distritál Baucau julga no absolve arguidu Manuel da Costa Neto ne'ebé alega prátika krime omisídiu negligente hasoru vítima Juleta Soares. Kazu akontese iha 04 Maiu 2011, iha Hostico Vemasse Baucau.

Akuzasaun Ministériu Públiku niaan haktuir katak iha 04 Maiu 2011 arguidu hodi kareta marka Mitsubishi ho número matricula 50568 tula rai-henek husi Vemasse atu ba Hostico. Arguidu halai kareta ho velocidade máximu no too iha dalan atu ba Hostico nian arguidu lakon kontrola hodi soke

vítima ne'ebé la' o iha estrada ninin. Momentu ne'ebá arguidu nia atensaun ba estrada tanba hasoru malu ho kareta seluk.

Ministériu Públiku akuza arguidu kontra krime omisídiu neglijente tuir artigu 140 Kódigu Penál.

Arguidu deklara katak vítima la' o hakbesik ba kareta no baku nia ulun ba kareta mesmu arguidu apita dala tolu. Iha momentu ne'ebá arguidu nia atensaun ba estrada tanba hasoru malu ho kareta seluk. Arguidu mós deklara katak nia ajuda ona osan hamutuk \$ 2000.00 ba familia matebian hodi hola kaisaun, fos, no sasan seluk.

Testamuña Pascoal Celestino da Silva Ximenes no Saturnino da Costa Belo, reforsa deklarasaun arguidu nia katak kareta halai ses malu ho kareta ida mai husi oin no antes ne'e arguidu apita dala tolu ba vítima maibé vítima kontinua la' o ba iha kareta nune'e soke vítima.

Testamuña Augusto Freitas no Emilia Freitas (vítima nia oan sira) depoimenta katak sira la hare akontesimentu, maibé depoisode akontese mak sira ba iha fatin akontesimentu.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 2 maibé suspende ba tinan 3. Iha parte seluk defeza husu ba tribunál atu absolve arguidu husi kazu ne'e tanba neglijénsia ne'e mai husi vítima rasik.

Iha 20 Marsu 2013, tribunál lee sentensa hodi fo absolvisaun ba arguidu Manuel da Costa Neto. Tribunál konsidera katak alegasaun krime neglijénsia ne'ebé Ministeriu Públiku akuza hasoru arguidu la provadu.

5. Kazu krime ofensa ba integridade fízika grave - Nú. 166/Crm.C/2011/TDB

Tribunál Distritál Baucau

Kompozisaun tribunál : Koletivu

Juises : Dr. José Gonsalves, Dr. Afonso Carmona no Dra. Angela F. Belo

Minsitériu Públiku : Dr. Pascasio de Rosa Alves

Defeza : Dr. Rui M. Guterres no Dr. Gil Amaral

Konkluzau : Kontinua prosesu

Iha 07 no 14 Marsu 2013, Tribunál Distritál Baucau hala' o audiénsia julgamentu ba arguidu na'in 5 ho inisiál hanesan DSP, DSL, JG, FSG no JSP ne'ebé diskonfia komete krime ofensa ba integridade fízika grave hasoru vítima AM (nu'udar membru polisia). Kazu ne'e akontese iha 27 Novembru 2010, iha Suku Caraubalu, Sub-distritu Viqueque, Distritu Viqueque.

Iha akuzasaun haktuir katak iha 27 Novembru 2010, iha festa koremetan ida, arguidu sira baku no tebe lisuk vítima too vítima nia nehen tolu monu sai, hasan kanek no bubu. Motivu husi akontesimentu ba kazu ne'e tanba vítima basa arguidu sira nia alin mane ida ho inisiál MB. Relasiona ho aktu ne'e Ministériu Públiku akuza arguidu sira kontra artigu 146 Kódigu Penál kona-ba krime ofensa ba integridade fízika grave.

Iha audiénsia julgamentu ne'e arguidu sira uza sira nia direitu nonok. Iha parte seluk, vítima reforsa faktu sira ne'ebé Ministeriu Públiku akuza hasoru arguidu sira, no deklara mós katak arguidu sira mós hadau estik no tebe lakon vítima nia pistol.

Testemuña OX depoimenta katak iha 27 Novembru 2010 mais ou menus tuku 01:00 madrugada, vítima ba hakalma ema barulho iha tenda liur, nomós baku arguidu DSP ho nune'e arguidu sira baku lisuk vítima.

Julgamentu kontinua fila fali iha loron 05 Abril 2013, hodi rona tan depoimentus husi testamuña seluk.

6. Kazu krime danu agravadu - Nú. 195/Crm.C/2012/TDB

Tribunál Distritál Baucau
Kompozisaun Tribunál : Singulár
Juis : Dra. Angela F. Belo
Minsitériu Públiku : Dr. Baltazar Ramós
Defeza : Dr. Grigorio de Lima
Konkluzau : Adia

Iha 08 Marsu 2013, Tribunál Distritál Baucau adia julgamentu ba kazu krime danu agravadu tanba testemuña sira la marka prezensa iha tribunál. Tribunál marka fila fali loron julgamentu ba iha 13 Setembru 2013.

Kazu ne'e involve arguidu ho inisiál ISM hasoru vítima ECP ne'ebé akontese iha 28 Outobru 2011 iha Baucau.

7. Kazu krime ofensa ba integridade fízika simples - Nú. 153/Crm.S/2012/TDB

Tribunál Distritál Baucau
Kompozisaun tribunál : Singulár
Juis : Dr. Antonio Fonseca
Minsitériu Públiku : Dr. Baltazar Ramós
Defeza : Dr. Grigorio de Lima
Konkluzau : Kondena pena suspensaun

Iha 11 Marsu 2013, Tribunál Distritál Baucau julga arguidu Pedro Manuel do Santos ne'ebé komete krime ofensa ho natureza violénsia doméstika hasoru nia fen Mariana de Jesus. Kazu ne'e akontese iha 16 Outobru 2011 iha Suku Rasa, Sub-Distritu Lospalos, Distritu Lautem.

Ministériu Públiku akuza arguidu nu'udar autór material ba kazu krime ofensa ba integridade fízika simples bazeia ba artigu 145 Kódigu Penál konjuga ho artigu 35 Lei Kontra Violénsia Doméstika.

Iha akuzasaun haktuir katak iha 16 Outobru 2011 arguidu no vítima diskuti malu kona-ba plantasaun. Iha momentu ne'ebá derepente arguidu tuku dala rua iha vítima nia hasan parte karuk no los ne'ebé kauza vítima sofre bubu no moras.

Iha tribunál nia oin, arguidu konfesa katak akuzasaun loos no arepende ninia hahalok. Arguidu mós deklarara katak agora dadaun sira moris hamutuk nu'udar fen ho laen hanesan bai-bain.

Iha alegasaun finál, Ministériu Públiku husu ba tribunál atu kondena arguidu ho pena prizaun fulan 6 maibé suspende ba tinan 1. Parte defeza husu ba tribunál atu absolve arguidu tanba arguidu konfesa, arepende, no arguidu mós idade avansadu ona.

Depoisde alegasaun oral, tribunál halo leitura sentensa no konklui katak arguidu provadu duni komete krime violénsia doméstika hasoru vítima, maibé tanba arguidu konfesa, manifesta nia arependimentu no idade avansadu, tribunál konklui hodi kondena arguidu ho pena fulan 3 prizaun maibé suspende ba fulan 6.

8. Kazu krime ofensa ba integridade física simples - Nú. 07/Crm.S/2011/TDB

Tribunál Distritál Baucau

Kompozisaun tribunál : Singulár

Juis : Dr. José Gonsalves

Minsitériu Públiku : Dr. Aderito Tilman

Defeza : Dr. Grigorio de Lima

Konkluzau : Adia

Iha 12 Marsu 2013, Tribunál Distritál Baucau adia julgamentu ba kazu krime ofensa simples ho natureza violénsia doméstika ne'ebé involve arguidu ho inisial VG hasoru vítima ACG ne'ebé nu'udar arguidu nia kaben. .

Jugamentu ne'e adia tanba arguidu rasik la notifikadu, nomós vítima inklui testemuña sira ne'ebé notifikadu ona la marka sira nia prezensa iha tribunál.

Julgamentu adia ba iha loron 30 Abril 2013.

9. Kazu krime abuzu seksuál ba menór - Nu. 76/Crm.C/2012/TDB

Tribunál Distritál Baucau

Kompozisaun tribunál : Koletivu

Juis : Dr. José Gonsalves, Dr. Afonso Carmona no Dra. Angela F. Belo

Minsitériu Públiku : Dr. Aderito Tilman

Defeza : Dr. Grigorio de Lima

Konkluzau : Kondena pena prizaun

Iha 12 Marsu 2013, Tribunál Distritál Baucau hala'o leitura sentensa ba arguidu Domingos dos Santos ne'ebé komete krime abuzu seksuál hasoru vítima ho inisial EMdJ. Kazu ne'e akontese iha loron 07 Marsu 2011, iha Distritu Lautem.

Iha inísiu Ministériu Públiku akuza ho artigu 172 Kódigu Penál kona-ba krime violasaun seksuál, maibé depoisde tribunál halo avaliasaun faktu sira husi kazu ne'e , tribunál rasik altera kualifikasaun jurídiku ba artigu 177 kona-ba krime abuzu seksuál ba menór ho agravasaun tuir artigu 182. (1) Kódigu Penál.

Tribunal konklui katak arguidu provadu lori vítima ba iha duut laran halo abuzu seksuál ba vítima. Tribunal mós prova katak arguidu hodi nia liman taka vítima niaibun bainhira vítima tenta atu hakilar, arguidu halai husik hela vítima laos tanba arguidu nia konsiensia no konsentimentu maibé tanba arguidu hetan vítima nia aman ne'ebé la'o ba fatin akontesimentu tanba rona vítima hakilar.

Bazeia ba faktu hirak ne'e hotu tribunál konklui hodi kondena arguidu ho pena tinan 7 fulan 6 prizaun.

Ministériu Públiku la satisfas ho dezisaun refere no tenta halo rekursu tanba pena ne'ebé tribunál aplika ba arguidu ne'e la ekilibriu ho hahalok ne'ebé arguidu komete.

10. Kazu krime ofensa ba integridade física simples -- Nú. 132/Crm.S/2010/TDB

Tribunál Distritál Baucau

Kompozisaun tribunál : Singular

Juis : Dr. Afonso Carmona

Minsitériu Públiku : Dr. Baltazar Ramós

Defeza : Dr. Grigorio de Lima

Konkluzau : Kondena ho pena suspensaun

Iha 12 no 22 Marsu 2013, Tribunál Distritál Baucau hala'o prosesu julgamentu no hamonu pena suspensaun ba kazu ofensa simples ho natureza violénsia doméstika ne'ebé komete husi arguidu Jacinto Ximenes hasoru vítima Maria Soares hanesan arguidu nia fen. Kazu ne'e akontese iha 20 Abril 2010, iha Caibada, Uaimua, Baucau.

Ministériu Públiku akuza katak iha loron 20 Abril 2010, vítima ho arguidu diskuti malu tanba vítima diskontente ho hahalok arguidu ne'ebé la'ó ho fetu seluk. Tanba ne'e, arguidu lori nia ain-tur fai iha vítima nia sorin los no kelen too vítima monu ba iha ai-tarak laran. Arguidu kontinua kaer vítima nia liman no rasta ba iha estrada. Aktu ne'e kauza vítima sofre bubu no moras iha parte sorin los, kelen no isin lolon tomak.

Arguidu deklara ba tribunál katak akuzasaun loos hotu no nia arepende ninia hahalok hirak ne'e.

Iha alegasaun finál, Ministériu Públiku husu ba tribunál atu kondena arguidu ho pena fulan 3 prizaun maibé suspende ba tinan 1. Parte defeza husu ba tribunál atu aplika pena ne'ebé adekua tanba arguidu konfesa, arependidu no responsabiliza ba familia.

Iha loron 22 Marsu 2013, tribunál lee sentensa ba arguidu hodi kondena arguidu ho pena fulan 6 prizaun maibé suspende ba tinan 1. Aleinde ne'e, tribunál mós kondena arguidu selu kustus judicial hamutuk \$ 30.00.

11. Kazu krime ofensa ba integridade física simpels - Nú. 92/Crm.S/2012/TDB

Tribunál Distritál Baucau

Kompozisaun tribunál : Singulár

Juis : Dr. Afonso Carmona

Minsitériu Públiku : Dr. Aderito Tilman

Defeza : Dr. Grigorio de Lima

Konkluzau : Kondena ho pena suspensaun

Iha 12 Marsu 2013, Tribunál Distritál hala'o leitura sentensa ba arguidu Afonso dos Reis ne'ebé komete krime ofensa ho natureza violénsia doméstika hasoru vítima Adelia Pereira hanesan arguidu nia fen. Kazu ne'e akontese iha 15 Marsu 2012 iha Uatukarbau, Distritu Viqueque.

Tribunál kondena arguidu ho pena fulan 3 prizaun maibé suspende ba fulan 6 inklui kondena mós arguidu hodi selu kustus judicial hamutuk \$ 20.00.

Pena ne'e aplika ba arguidu bazeia ba produsaun de provas ne'ebé hatudu katak arguidu komete duni ofensa hasoru nia fen ho meus dudu vítima ho kadeia too monu hodi fo impaktu vítima sofre kanek iha ain.

12. Kazu krime ofensa ba integridade fízika simples - Nú. 172/Crm.S/2012/TDB

Tribunál Distritál Baucau

Kompozisaun tribunál : Singulár

Juis : Dr. Afonso Carmona

Minsitériu Públiku : Dr. Pascasio de Rosa Alves

Defeza : Dr. Grigorio de Lima

Konkluzau : Kondena ho pena suspensaun

Iha 13 no 22 Marsu 2013, Tribunál Distrital Baucau hala'o prosesu julgamentu no leitura sentensa ba arguidu Jacob Sarmento Alves ne'ebé komete krime ofensa ba integridade fízika simples hasoru vítima Mario Sarmento. Kazu ne'e akontese iha 06 Janeiru 2012, iha Aldeia Manehat, Suku Caraubalu, Sub-Distritu Viqueque, Distritu Viqueque.

Iha akuzasaun haktuir katak, iha 06 Janeiru 2012, arguidu no vítima diskuti malu tanba vítima ba buti arguidu nia maun tanba duun vítima buan. Iha momentu ne'ebá, arguidu tuku dala ida iha vítima niaibun hodi kauzaibun kanek no bubu.

Relasiona ho aktu ne'e, Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Durante julgamentu arguidu konfesa totálmente faktu sira ne'ebé Ministériu Públiku akuza hasoru nia no arguidu hatudu arependementu ba ninia hahalok.

Iha alegasaun finál, Ministériu Públiku husu ba tribunál atu kondena arguidu fulan 3 prizaun maibé suspende ba tinan 1. Iha parte seluk, defeza husu ba tribunál atu absolve nia kliente tanba arguidu konfesa, arepende laiha antesidente kriminais no responsavel ba familia.

Iha lora 22 Marsu 2013, tribunál lee sentensa ba arguidu no kondena arguidu ho pena fulan 6 prizaun maibé suspende ba tinan 1, inklui kondena selu mós kustus judisial hamutuk \$ 20.00.

13. Kazu krime omisídiu agravadu - Nú. 170/Crm.C/2012/TDB

Tribunál Distritál Baucau

Kompozisaun tribunál : Singulár

Juis : Dr. Jose Gonçalves (representa juis singular)

Minsitériu Públiku : Dr. Pascasio de Rosa Alves

Defeza : Dr. Grigorio de Lima

Konkluzau : Kondena ho pena prizaun

Iha 14 Marsu 2013, Tribunál Distritál Baucau hala'o leitura akordaun ba kazu omisídiu agravadu forma konsumadu ne'ebé akontese iha 23 Agostu 2012 iha Osogori, Venilale Baucau. Kazu ne'e involve arguidu Idelfonso Guterres hasoru vítima Mariano Ximenes (matebian).

Ministériu Públiku akuza arguidu nu'udar autór material ba kazu krime omisídiu simples ne'ebé preve iha artigu 138 Kódigu Penál konjuga krime omisídiu agravadu ne'ebé preve iha artigu 139.g Kódigu Penál.

Tribunál prova katak arguidu prátika krime omisídiu hasoru vítima ho meus uza ai-pedasuk ida baku iha vítima niaulun too vítima monu ba rai, arguidu kontinua foti fatuk boot ida tuda ba iha

vítima nia ulun too sofre kanek boot no ran sai makas. Aktu ne'e kauza vítima mate kedas iha fatin akontesimentu. Motivu husi akontesimentu tanba arguidu diskunfia vítima mak foti nia sigaru masu ida.

Bazeia ba faktu provadu hirak ne'e no sirkunstánsia sira ne'ebé asosiadu ho prosesu ne'e, tribunál konklui hodi kondena arguidu ho pena tinan 15 prizaun.

14. Kazu krime ameasa - Nú. 83/Crm.S/2012/TDB

Tribunál Distritál Baucau

Kompozisaun tribunál : Singulár

Juis : Dr. Jose Gonsalves (representante juis koleтиву)

Minsitériu Públiku : Dr. Baltazar Ramós

Defeza : Dr. Grigorio de Lima

Konkluzau : Omologu

Iha 19 Marsu 2013, Tribunál Distritál Baucau hala'o tentativa konsiliausaun ba arguidu Aderito da Costa Correia ho vítima Maria do Carmo. Kazu ne'e akontese iha 15 Jullu 2012, iha Distritu Baucau.

Iha audiénsia tentativa konsiliausaun ne'e vítima no arguidu simu malu no vítima decide atu dada fila fali kazu ida ne'e. Nune'e tribunál bazeia ba vítima nia rekerementu, omologu tiha kazu ida ne'e.

15. Kazu krime ofensa ba integridade fízika simples - Nú. 194/Crm.S/2012/TDB

Tribunál Distritál Baucau

Kompozisaun tribunál : Singulár

Juis : Dr. Afonso Carmona

Minsitériu Públiku : Dr. Baltazar Ramós

Defeza : Dr. Grigorio de Lima

Konkluzau : Kondena ho pena suspensaun

Iha 20 Marsu 2013, Tribunál Distritál Baucau hala'o prosesu julgamentu no kontinua ho lee sentensa ba arguidu Joaquim Lopes ne'ebé prátika krime ofensa hasoru vítima Rosalina Aekluan hanesan arguidu nia fen. Kazu ida ne'e akontese iha 12 Setembru 2012, iha Suku Irabin de Baixo, Sub-Distrito Uatucarbau, Distrito Viqueque.

Ministériu Públiku akuza arguidu nu'udar autór material ba kazu krime ofensa ba integridade fízika simples ho natureza violénsia doméstika ne'ebé preve iha artigu 145 Kódigu Penál konjuga ho artigu 35 Lei Kontra Violénsia Doméstika.

Iha akuzasaun Ministériu Públiku haktuir katak iha 12 Setembru 2012, arguidu hakfodak hader husi toba fatin, hodi ai pedasuk ida baku dala rua iha vítima nia liman no kontinua baku dala rua iha vítima nia ain. Arguidu nia atetudi ne'e kauza vítima nia liman, ain, kanek no bubu. Akuzasaun ne'e mós haktuir katak motivu husi akontesimentu ba kazu ne'e, tanba vítima basa halimar arguidu ne'ebé toba hela.

Durante julgamentu iha tribunál, arguidu konfesa faktu sira ne'ebé Ministeriu Públiku akuza hasoru nia no arepende ninia hahalok.

Iha alegasaun finál, Ministériu Públiku husu ba tribunál atu aplika pena fulan 1 prizaun maibé suspende ba tinan 1. Defeza husu ba tribunál atu absolve arguidu husi kazu ne'e, tanba arguidu konfesa, arepende no responsavel ba ninia familia.

Tribunál depois de halo produsaun de provas konklui hodi hamonu pena fulan 3 prizaun maibé suspende ba fulan 6. Tribunál konklui pena refere bazeia ba faktus provadu katak arguidu komete duni hahalok ofensa hasoru vítima.

Atu hetan informasaun kle'an, favor kontaktu:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Landline: 3323883

www.jsmp.tl